

王慎轩记：是年中元节后，患此者甚众，均用此方，莫不应手而愈。

86. 胸痹

潘左

胸痹，短气寸微关紧，栝蒌薤白汤主之。

全瓜蒌五钱 老薤白三钱 上高粱酒一杯

王慎轩记：患此者多系缝工，良由俯屈太久，胸中阳气不达。曹师每用此方，多有奇效，兹录其一，余者方案兹全，均不赘。

87. 胸背痛

凡人劳力则伤阳，耐夜则寒袭。然而采芙蓉膏泽一榻明灯，冒城郭星霜五更寒柝，卒不病此者，盖以卧者阳不散，行者阳独张也。唯劳力伛偻之人，往往病此。予向者在同仁辅元堂亲见之。病者但言胸背痛，脉之，沉而涩，尺至关上紧。虽无喘息咳吐，其为胸痹，则确然无疑。问其业，则为缝工。问其病因，则为寒夜伛偻制裘，裘成稍觉胸闷，久乃作痛。予即书栝蒌薤白白酒汤授之。方用：

瓜蒌五钱 薤白三钱 高粱酒一小杯

二剂而痛止。

翌日，复有胸痛者求诊，右脉沉迟，左脉弦急，气短，问其业，则亦缝工。其业同，其病同，脉则大同而小异。予授以前方，亦二剂而瘥。盖伛偻则胸膈气凝，用力则背毛汗泄，阳气虚而阴气从之也。唯本条所举喘息咳唾，所见二证皆无之，当移后节不得卧上，为其兼有痰饮也。

【按】《金匱》曰：“胸痹之病，喘息咳唾，胸背痛，短气，寸口脉沉而迟，关上小紧数。栝蒌薤白白酒汤主之。”